

Monday, June 1, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

SERICULTURE MINISTER

Sericulture Minister Pu Lalthansanga'n muga pangang khawina tur atana Central Silk Board, Boko, Guwahati nursery atanga lak chhuah Bul tiak singhnih chu Mualpheng leh Keifanga Progress Partner mi 41 te phun turin tukin khan Directorate of Sericulture, Chaltlang atangin a vai liam.

Heng bul tiak te hi tin 61 hmun vel a zauva phun tur a ni a, Hand Holding scheme hnuaiiah Sericulture Department leh Mizoram Khadi and Village Industries Board tang kawp project hi Saitual District khua Mualpheng leh Keifangah te kalpui mek a ni.



ASF

Vawk pul hri, African Swine Fever (ASF) avanga kum 2024 chhunga vawk suat neitute hnena zangnadawmna pek tur cheng nuai 2195 chu vawk neitute hnenah pek a ni tawh a; sorkar laipuaiah kum 2025-a vawk suat neitute hnena pek tur zangnadawmna cheng nuai 194 vel dil lek mek a ni.

AH&Vety department hotute chuan Akashvani News Aizawl zawhna chhangin, ASF vanga vawk suat neitute hnena zangnadawmna pek tur chu central sorkar leh Mizoram sorkarin an za zela 50 ve ve-in an intum sem avangin sorkar laipua zangnadawmna tura chhut atanga zaa 50 dil thin a ni a, hemi atanga sorkar lipuiin a rawn pek ang zat chiah hi state sorkar chuan a pe ve thin. Kum 2024 chhunga vawk suat neitute hnena sorkar laipua zangnadawmna dil hi a vaiin a rawn pek loh avangin zangnadawmna pek zawng zawng hi zaa 89 vel a ni, an ti.



LIVESTOCK INSURANCE

Ran vulhtuten an ran vulhte an thih palh pawha sum an hmuh theihna tura Mizoram sorkarin National Insurance Company (NIC) thawhpua sorkar laipui scheme National Livestock Mission (NLM) hnuai a kalpui 'Animal Insurance'-ah nimin thleng khan vawk 2774, bawng 6 leh kel 7 insurance tih a ni tawh.

NIC hotute hnen atanga Akashvani News Aizawl thudawn danin, ran insurance tihnaah hian nimin thleng khan vawk vulhtuten an vawk vulh lai 2774 chu insurance an tihsak tawh a, Aizawl district-ah vawk insurance tihsak 1550 awm tawhin a tam ber a; Siaha district-ah insurance ti an la awm lo. Bawng insurance tihsak hi Aizawl district-ah 5 leh Serchhip district-ah 1 a ni a; kel insurance tihsak tawh 7 hi Lunglei district-a mi vek an ni.

((VOICE CAST - Animal Insurance hi vawk, bawng, sial, kel leh beram-ah a tih theih a, insurance tihsak rante hi khuarel chhiatna leh hri avanga an thih chuan

ranvulhtute hnenah NIC hian an ran vulh hlutna hùà chhût pawisa an pe dawn a - an len dan a zirin vawkah hian Rs 7200-24000 inkar hmuh theih niin, bawng leh sialah hian Rs 14000 - 48000 leh kel leh beram-ah hian Rs 1680 - 5600 hmuh let theih a ni. Ran insure te hi an lo thih palh a nih chuan ran vulhtute hian kim takin insurance pawisa dilna atan pawimawhte an neih kima, insurance an claim a nih chuan NIC hian a rang thei ang berin an chinfel sak tur a ni a, NIC hian an tih turte ni 15 chhunga an ti zo hman lo a nih chuan ran vulhtute hnena sum an pek tur hi zaa 12-in a pung dawn a ni))



RS ELECTION NOTIFICATION

Rajya Sabha seat 24 hnawhkhat tura inthlan tura chuh tum te tan vawiin atang hian hming pek luh hun hawn tan a ni a, tun thla ni 8 thleng thelulhun hun hawn a ni ang.

Mizoram, Manipur, Meghalaya leh Arunachal Pradesh a seat 1 theuh, Andhra Pradesh, Gujarat leh Karnataka seat 4 theuh leh Rajasthan leh Madhya Pradesh-a seat 3 leh Jharkhand a seat 2 hnawhkhat turin inthlan hi neih tur a ni.

Hetihlai hian state 3-Maharashtra, Tamil Nadu leh Odisha Rajya Sabha by election neih tur atana hriattirna chu vawiin hian chhuah a ni dawn bawk a ni.

Rajya Sabha inthlan vote thlak hi tun thla ni 18 ah neih tur a ni a, hemi ni vek hian vote thlak zawhah vote tla te chhiar nghal a ni ang.



PM

Prime Minister Narendra Modi leh Myanmar President U Min Aung Hlaing te chu vawiin khan New Delhi ah an inkawm a, ram 2 te history leh inlaichinna te an sawi dun a, intlawhtawna leh venhimna lam tih that dan te an sawi dun bawk a ni.

Myanmar President hian vawiin tlaiah President Droupadi Murmu chu Rashtrapati Bhavan ah a kawm bawk ang.



PM SVANNIDHI

PM SVANidhi scheme chu hman anih atangin a kum 6 na a tling ta a, Prime Minister Narendra Modi chuan he scheme hi fakin kawngsira thilzuar te tana duan anih angin, heng tanpui mamawh tak tak te hian hmalam pan nan an hmang a ni a ti.

Kan corr report danin, 2020-a hman tan a nih atang khan he scheme nuaia loan lak theih zat cheng nuai 12 chu cheng vbc 1 vel pekchhuah a ni tawh a ni.

